

出使美日秘國日記

出使美日祕崔日記

四月初一日晴

午初乘車至格總統墓所未正而到現總統及各部大臣亦相繼而到格夫人暨其子媳孫均到碑在墓之西南方工程甚巨聞已費銀三萬餘矣巡捕到者約百人軍兵到者十餘隊水師隊亦有到者各部大臣惟外部水師部患病未到百姓到者數萬山隴爲之蔽先宣頌詞者爲總理紀功碑人次總統次教士次爲善頌者頌畢已中正矣總統以頌文置碑下先退下臺因與格夫人等作周旋畢欲下臺已擁擠不能行久之始下上車後車數千輛又擁擠不進乃改由東道至領事署已酉正矣飯畢於戌正赴火車廠

亥初開車天明抵華盛頓

初二日晴

卯正入使館參贊以下均未興辰正飯後查上下議院因意見不合各派三人會議上議院三人爲多福地甫司白得勒白得勒告假代之者爲克累下議院三人爲好德蓋力匪姐本日尙未議及也 謁狀師絡活夫人夫人言新派各紳伊嘗往見責以大義此中多公正之人可望信受云

初三日已後小雨申後止

謁律司查議院事言地甫司克累二人亦告假院長又以宣文摩根代之日內卽會議矣律司又言因赴紀功碑之會美國紳民深

以中國不忘故舊屢見於報此舉甚爲有益云 未刻接總署電
云經費已照撥江 撰抵制美國苛例華人條陳

初四日晴

新報載中國公使以前總統格蘭脫墓立紀功碑親帶繙譯赴會
見中國之不忘故舊且言格蘭脫遊歷中國與李中堂至契中國
公使年年於墓祭之期親自送花從未間斷中國如此優待美國
美國之立苛例以禁華人殊無禮也 因謹按格總統紀功碑會
到者約數萬人各國公使亦多到者而新報獨言中國蓋以新例
之酷代爲不平也此亦公論之不容混矣

初五日晴

紐約鐵路公司之狀師來見言美國工黨妒忌華人之奪其工且減工價致各司之棄工黨而用華人已深惡之華人又不安分致工黨有所藉口此次工黨爲破釜沈舟之舉倩人挾巨資通聲氣以禁華人議紳之不染指者甚少而下議紳爲尤多云 因謹按議紳舉動本屬可疑下議紳尤爲可疑其議新例也只一刻而卽成是先有成議也聞此言乃恍然悟矣

初六日晴申刻大雨天氣驟熱雨至夜而止

下議紳名狹麻者與因最契且常言美國苛例之非其眷口且常過從此時忽附蓋力上議紳斯斌介不來奔亦至契者今則中立嘿無一言地甫司白得拉前之侃侃而談詆新例之非者今均告

假不願與議摩根向謂新例背約令乃附和蓋力之領照註冊一條非鐵路狀司言因實不解其翻覆之故矣

初七日晴熱

訪律司查詢上下議紳合議之例律司云下議紳蓋力之新例上議紳已駁棄惟禁由英屬卡拿大暨由墨西哥國潛偷入境之華工此例行之已久今不過更認真辦理耳認真之法則惟分別華工之新舊舊華工之現在美境者飭其領照卽由卡拿大墨西哥偷入美國共業已入境者既往不咎亦准領照自今以後再有偷入境者其人無照自無所容然亦予限一年此一年內之偷入者仍可領照一年以外則不能矣此言偷入美境之華工中國公使

例難過問前已聽之矣商人則不必領照其有願領照者亦給照非上議紳之力駁尙不止此因又查假道一節據云尙未議及

初八日晴

上議院所議之例已遞交下議院議紳好德火街安多羅等共十餘人仍以此例爲非其以前投籌之一百七十餘人并士吉飛路頓等以爲可行遂議准送上議院矣

初九日晴

新例今日送交總統因卽於午初謁外部布連病未到署遂見華頓爲言新例之背約華頓深爲抱歉言外部實無權此美國之例也諒可鑒原因言此例不能不駁本日照會未刻必到請呈總統

華頓言必爲卽呈因辭出遂趕膳菜飭洋僕速送外部時華頓尙在署已接受立交辦事人遞總統處矣

初十日晴午後大風暴雨卽止

聞上下議院合議領照之例昨呈總統總統卽派人邀外部戶部律政部署商數語卽批准發行云 因謹按下議紳蓋力等之建議可謂不顧國體乃附之者一百七十餘人則知徇工黨者衆矣上議紳尙持正論故蓋力之例不行而華工領照一事不願者只十五人平心而論既禁工十年矣領照以別新舊其意不過欲禁新來之工無他意也然而苛也

十一日晴

律司來言此次下議紳之新到者受工黨之託一鼓作氣事在必成爲上議紳宣文等所阻雖面從之心實不甘戶部司員前擬苛例呈上議院亦爲宣文所駁心亦未鑿查領照一事亦不過照光緒十年及十四年之例限制後來之工及復回之工而已然戶部司員恰好藉此爲詞行其苛索將來公事又增轆轤矣

十二日晴

午正接總理衙門來電云美例廢新仍舊所廢所仍究係某年某例華工領照須註冊否卽復電文當卽復電云駁棄今年新議仍壬午甲申戊子例兼註冊因英公使來見言美國當蒲安臣立約之時求華工之至若渴以後乃因工黨之妒再三立例禁工全

不守約此次領照註冊又進一層所以如此者以類年屢次嘗試
貴國不爲抵制報復故放膽爲之也報復二字中國一向謹慎誠
不輕舉然抵制未始不可也今貴大臣之意如何因答曰新例甫
定已電達本國政府以俟後命因未能輕動云

十三日晴

謁英公使已出門未見前駐中國公使楊約翰來見言已見總統
微窺其意知新例之所以批准者將爲蟬聯計也然前任已有此
心卒未遂願徒爲人竊笑耳因答曰此余耳可聞而口不可言者
未知所對楊約翰又言已將新例寄李傅相以後再相機耳因曰
然此外皆應酬語

十四日 晴午後大雨

謁律師告以中國來電并詢善後之策律司云下議紳蓋力苛例大害於華人駁除將盡而以領照爲轉圜且丁躉良去年卽建華人領照之議爲華人安居地也以後如美國地方官及關吏不相苛索殊無大害但須設法防之耳

十五日 晴小雨申後見日

查此次議例上議紳外交處九人無不以新例爲背約下議紳之持正者只好德火街安多羅三人耳而附蓋力者極多故蓋力之勢盛工黨又密派人挾貲以賂議紳其受賂者始詆蓋力而終附之上議紳明雖不阿而暗畏其激成投籌故以領照爲調停之計

也

十六日晴

華王領照例光緒十七年卽西歷一千八百九十一年三月工黨業已舉行因飭金山總領事照錄一通寄閱本日寄到查此例係二十五條除出使人員外悉行禁絕來美其收費甚重其約束至嚴其第二十二條乃至照化外人之例辦理可謂苛虐無理之至乃知蓋力之例卽工黨所授也下議院有稍知大體者故刪其至無理者而以示上議紳幸卽被駁斥則上議紳猶以禮自持也

十七日晴

當下議院例遞上議院之時上議紳魏禮森曰我美創國以來各

國人民均准隨時隨地入籍迭山美國出使人員轉告外國政府各國固執不允均謂入籍一事不能由民人自主因是之故美國以求各國人民來美入籍一事與各國歷年爭論至一千八百六十八年美國議院立例聲明准各國人民隨便入籍載在政綱卽於是年七月二十七號由總統批准次年蒲安臣訂立中美條約其第五款與政綱相符則是天下各國於准人民入美籍一事最先允美國所請者中國也今下議院立例不遵美國政綱又悖中美條約前後相反自食其言余於一千八百八十八年議院議禁華工時曾斥其非而此次下院所議比前猶酷尤非理也 因謹按美國非無偉人也特無如徇工黨者多勢不敵耳

十八日小雨至酉而止

美國醫生瑪高溫於滬上行醫聞美國新例致書於因極詆新例之不公因按光緒十三年前任出使大臣張蔭擬於金山設立中國醫院美人以中國醫生應由美醫院考試給照然後准其行醫瑪高溫如寓金山其用意立言亦不過附和工黨耳此時爲詆新例之言亦慮中國政府仿美例以矛盾盾耳然而中國不爲也

十九日晴

本日報言考究家查自德法交戰以來德國整頓水陸軍務用費計銀二千二百兆圓合中國銀二十二萬萬圓因謹按德法師

丹之戰迄今二十三年分而計之則每年需軍費一萬萬圓國不富者安可籌耶當時德索法國兵費約得十萬萬圓以此數乘除之可抵二十二萬萬之半則每年只籌五千萬圓在德國尙易爲力若在義奧日諸邦亦未易措置矣此富強二字所以相因也

二十日晴

接北洋文言新創電綫由俄達歐洲其價較廉由洋人璞爾生成金生經手其中有密電不能代轉一欸 因查所謂密電者係發電與收電之人預先訂定惟二人獨知之旁人安知其爲密哉殊難索解存之以俟質疑

二十一日晴

俄大饑由俄廷振濟府庫爲之空虛入款又短前此定期操演大軍以此項川費需一百五十萬羅卜合中銀約百萬現以費絀業已停操矣 因僅按俄君好武而災及其民蒼蒼者似夢夢也俄廷因此而能操非以卹民實欲節費俄君之心可知矣府庫空乏乃至百萬亦不能儲俄之窮可知矣俄歲入亦計銀三萬萬兩有零耗於用兵者大半俄之佳兵可知矣前此告貸於法而法允之告貸於德而德卻之俄之債累可知矣天心悔亂使俄如元世祖之末路歐亞兩洲其太平乎

二十二日 晴未刻見兩點乃雲見日

美國議院議鑄銀錢未衷一是近請歐洲各國派員會議俾金錢

銀錢並行無礙聞英義奧三國已許派員法與瑞士尙無明文然亦必允所請云 因謹按美以重四錢八分之金錢一圓抵七錢三分之銀錢十圓按輕重乘除之每銀一兩五錢二分可易金一錢是金價低而銀價高宜其金錢之漏入歐洲此一年中已有二百八十兆磅中國滙銀至美近日每庫平一萬兩只得美銀一萬一百三十八圓按輕重而權之每規銀一萬兩只得美銀六千七百五十兩是三分而去其一也其不平孰甚焉宜美國急求整頓也

二十三日晨起陰辰正大雨至午而霽未後又小雨

巴黎來電言法國自得越南其民不服常與防兵爲讎近日兵民

慶戰越民死者一百二十五人法兵六十八人內兵弁五人云
因謹接癸未甲申法越之戰法兵屢挫中國以統領非人至於終
厥致失北甯法人滋擾不休幸淮軍諒山大捷而法不敢佳兵言
歸於好自時厥後法以重稅治越南越民不服法常損兵折將蓋
得不償失矣

二十四日

時晴時雨

是月爲各省舉總統之期本日華盛頓報言金山一省之工黨以
下議院紳蓋力建議嚴禁華工雖未全用實已出力擬舉爲副總
統又言上議院紳宣文本有總統之望惟其駁棄蓋力之例太平
洋一帶人民均不謂然舉者少矣 因謹按美國分黨有四一北

黨二南黨此二黨者人數至多權力最大議院總統由其舉錯其次爲工黨亦有權勢但其用權與南北二黨異蓋南北黨如水火南黨不舉北人北黨不舉南人也工黨則不分南北人惟常懸賞有能苛禁華人者則舉之其黨頗多附北黨則北黨勝附南黨則南黨勝故南北二黨皆畏之徇之又其次爲農黨現在勢微不能自立一職依草附木而已

二十五日 卯初天陰辰正大雨至申而霽

謁律師託其致意美戶部因聞戶部已籌撥銀十五萬圓爲籌發照新例之費本日又聞上下議院管理限禁歐亞各國人來美之議紳會同議例分別良莠以杜弊端業有成規不日頒行律司許

以是晚卽至戶部查問云

二十六日

陰時小雨

二十三日美國議院以美國例輪船不由本國廠造者禁用美旗號遂致所購於英國之船皆用英旗殊失國體茲議弛禁准用美旗本日報言英人聞此甚懼利益爲美所奪且礙於用兵擬將前所售於美國之船購回云 因謹按法以救弊而救弊之法亦不能無弊也其能見其弊也恃乎識其能救其弊也恃乎力議院萃萬姓之心思以審時度勢固宜其有識矣合萬姓之稅租財貨以創制顯庸固宜其有力矣

二十七日

晴午刻見雨點

昨日倫敦來電言歐洲各國惟英國不抽入口稅而英國貨物運往各國均輸重稅天下各國以美國之入口稅爲最重以致英國受損而無益茲英國選舉議紳期近英相先期曉諭通國謂各國均圖利己重收入口貨稅而英獨以薄稅爲貴損己益人若不因時制宜改變舊章必致自累爲今日急務當修稅則重徵入口稅以重本國人民生計云 因謹按稅則者國之內政爲輕爲重本可自由歐洲各國大抵重徵入口之稅以裕國而不徵出口之稅以便民且入口稅重則他國之貨物難來不致奪我國之生計出口無稅則本國之貨本價賤足以供他國之行銷中國反其道而行之宜金銀漏卮於外洋而土產不行於異國也

二十八日晴

美國政事或歸省辦或歸國辦向有定章向來他國寓美人民有被戕命劫財之案均由本省自辦國家無權美國與各國立約雖云保護及至生事又以無權推諉去年紐阿連戕殺義人一案美廷推諉幾至決裂終出於賠卹今上議紳多福議將此種案件歸國家審辦云 因謹按此義國兵船之力也當美民戕殺義民之時美國亦以辦中美交涉之法處之一味推諉乃至義國撤使絕交美廷大恐以其水師之力不敵義也卒至卑禮遜詞以認賠卹而後歸於和好居今之世其可以不強哉

二十九日晴

本日新報言美國造礮愈出愈奇近日造成大礮一尊能於水底
施放現由水師部試驗是否可用卽當詳覆該部大臣云 因謹
按人心之靈猶井之水也井之新掘也其水常渾猶心之初用也
其思常鈍也非愈汲而水愈清猶心愈用而思愈啟也非之廢而
不汲者其水自枯猶思之廢而不用者其心自塞也歐墨各洲之
人用心最苦每造一密室獨坐其中終日思之必求有得其得也
則獻之國家國家給以憑據二十年內不准他人模仿則其人暴
得名而致富如中國善制藝而取科名也其有思之至老而終不
得者歿後其室必爲世人所貴重謂是固苦學者之所處而靈氣
所鍾也風氣如此宜其巧不可階哉

五月初一日 大吉晴酉刻大雨徹夜

墨西哥國來電言駐美公使已改充戶部大臣另派員來駐美又言布衛布路省各處地方近日華人到者甚多云 因謹按華工之到墨者向以爲到美之階近不能潛越至美故覺其多又華工近有去美赴墨者故益見多矣但必應先立章程則庶無後患耳

初二日 晴時雨

美上議院以新金山之東南有島名紐西蘭三十年前美人魏布士達於彼購地數千頃嗣英國佔其島地魏布士達請美政府照英外部索地英外部置不理茲議紳以爲美國本可按公法奪英所有以爲賠補惟於交誼有礙特請局外之國公斷云 因謹按

此案可以證中美之交涉矣英強於美美之爲民請命者英置不理美無如何也奪英所有此抵制之法而美恐傷交誼不遽行焉仍請局外之國公斷英如不允或可以行之乎英苟外畏人言內防抵制當不至一意橫行如美之待華工乎

初三日晴

巴黎來電言義國與德奧兩國聯盟實保義君一人主之民不謂然近日義民苦於重斂議院遂與各部爲難昨日又迫各部大臣辭職此一月內部臣竟兩辭職義主如不廢聯盟部臣難安於位云 因謹按歐洲各國武備實有騎虎難下之勢其經費不絀者只英一國而已若法若德則絀而未甚也俄則無歲不貸而猶有

貸之者也義則重歛而民不聊生矣日則每歲交息至五千萬矣
葡萄牙則直不能支持而鬻土地以清債矣天下之局一變而至
如此乃知古聖偃武之言爲民造福獨見其大也然而必不能也
初四日陰

美國北黨公舉總統前兩月間外部布連致書同黨之刻拉生云
無心總統現總統聞之大喜以爲莫予奪也乃自布連赴紐約後
而舉布連者多於現總統於是現總統亦出美都竭力收拾人心
今舉者亦多矣見華盛頓初三日報 因謹按美國當舉總統之
年憧擾熱中一如舉子之望榜也而終南捷徑尤以禁華工爲第
一階蓋禁華工則工黨必舉其人是可操券者已三之一矣華人

不入籍過此以往如鼠入牛角其道窮矣

初五日晴

是日爲美國展墓之節因卽於前格總統墓所送花 前日倫敦來電言卡拿大地方官請於英政府以本地所產五穀入英口岸與各國同如英國予以格外利益卡拿大亦減英國貨物入口稅以相報云 因謹按此卡拿大之抵制美廷也美創新例入英籍之客民均不准來美故請諸英廷以美國入英之五穀至多如英廷能使與卡拿大分別則本地五穀可望暢銷矣西人鑽利心思無孔不入於此可見

初六日晴

近聞俄駐北印度之步兵計二十萬人馬兵計三萬八千人查英駐守該地步兵計十萬人馬兵一萬三千人多寡相懸勢不敵矣因謹按俄人如洪水力之所到足以爲患各國防不勝防俄兵又調動無常近德則德增防近英則英增防近奧近土耳其共防之皆如不及防俄不戢兵各國皆不敢息兵矣印度爲英屬俄以重兵二十餘萬壓境土客之勢顯然不敵然因料俄人必不開釁者何也俄之水師萬不敵英兵端一敗水師爲英所殘矣所得不償所失也

初七日晴

巴黎來電言阿洲小國名烏干達曾立約歸英保護法國教士有

在此傳道者英駐該國武員不欲他國分其利權因虐待該教迫使他往法廷向英詰問英外部覆以未有所聞俟該武員稟到然後照覆云 因謹按法之天主教向不安分天下各國之所惡也弱者敢怒而不敢言強者則限制之如俄如德是也其次則詆毀之如美是也其次則窘辱之如義是也英人則直欲驅之矣因料該教士必不能安於其地也詰問何益哉

初八日晴

巴黎昨日來電言義國人民苦於重斂恐有內變聞義君屢請德主藉端與法啟費俾義國人民有事於外不生內患云 因謹按歐洲各國重斂以整武爲騎虎難下之勢所不至匱乏者惟英耳

其餘則蓄積有多寡卽形見有後先堂堂義大利乃至不惜民命以求孤注一擲其孱焉不終日之勢可想而知過此數十年歐洲大局其必大有變更也夫

初九日晴

謁外部大臣布連布連尙有病容寒暄畢因詢照覆事布連曰美議院權重所議新例余不能以爲是亦不能以爲不是惟中心抱疚而已因曰然則終不照覆我耶布連曰新例雖成行例時尙有通融幸勿介懷我等尙有補救之意至於照覆未避者以前亦當上緊辦理因再三訂定遂辭出因按布連之言其爲厚貌深情歟抑爲良心不泯歟未可知也外部本無議例之權落得推卸至

於照會久而不覆者則又以今年爲舉總統之年慮有觸礙也其必待於避暑出都之前者則以總統之舉此數日中可定既定矣則可任意言之而不憂觸礙也所謂患得患失者非耶

初十日晴

金山狀師阿他麥克自薦充中國駐美金山領事辭之 倫敦來電言英國下議院紳六年一換其權大於上議院蓋下議紳由民舉上議紳由世爵充各部大臣之任事必由下議紳允准也今年係換班之期謀此者極多云 因謹按歐墨洲各國均設議院而章程不同美之議紳均由民舉不分上下也英之下議紳由民舉而上議紳則由世爵然權歸於下議院則政仍民主之也歐洲除

法國瑞典瑞士外政皆君主而仍視議紳之從違則民權仍重卽
洪範謀及庶人孟子民爲貴之義也

十一日晴

昨日布連之黨致書於布連謂其有意爲總統卽當辭外部之職
以明其心使大眾見之而決於舉布連遂上書總統辭現任外部
大臣之職總統批准矣 因查本年爲美國公舉總統之年凡希
冀爲總統者無不分布黨羽竭力招徠擾擾營營熱中無已而祕
魯智利至以爭位遂動干戈以勝者攘不勝者之位又其甚矣以
美較之猶此善於彼也然如宣文之力持正論不事資緣無心於
舉而舉之者亦無多人豈三代直道不行於今歟蓋非華盛頓創

制之本意矣

十二日 晴未刻見雨點仍霽

南墨洲之英屬忌安擊地方以美國加稅出口之糖無利國用不足乃加礦稅古巴亦以入款不敷出亦加貨稅商民苦之云 因
謹按稅則爲內政本可增加而入口之稅尤應增加者蓋入口稅重則外國貨物不易入口卽不致奪吾民之生計近年中國入口之貨煤油洋紗洋針大行而本國所產棄之無用之地業此者皆失業矣識者傷之

十三日 晴

本日伯林來電言德君於本日由德都往啟爾海口期會俄君同

行者有外部大臣俄國駐德公使武員等俄君明日可到兩君之
會約有一日盤桓無公事相商但以修好而已 因謹接前此俄
德兩君訂會而俄君爽約遂至齟齬者半年德主遂有攻俄之言
俄主亦有敵德之語幾決裂矣而俄君此次之行仍肯過德德主
仍修地主之禮似可言歸於好其終不決裂者非真有推誠釋怨
之心特以兩國兵力皆強戰則無全勝之算而有民生之禍故未
敢妄動耳如其中有一弱者則戰局久開矣

十四日 陰 小雨

巴黎來電言俄德兩君之訂會法外部會照俄外部謂法人猜疑
恐礙兩國盟約俄君乃於會德君之時遣其介弟謁法主於南施

埠以示與法親厚法人大喜 因謹按法之於俄與日本相似矣
俄君之子被刺於日本日君恐懼失常問安不絕至許以後不干
預俄與高麗之事可謂怯矣法則前見俄與德分而喜今見俄與
德合而憂又見俄君之弟至法而大喜一若依以爲命也者何平
日之搶攘爲傑傲慢稱雄至是而恭敬有禮耶

十五日 陰細雨時霽

聞中墨洲海帶國之海口名刹買那願歸美國管轄美駐海帶國
及兼理三德明哥之公使已向三德購地云 因謹按美國近年
之所行非復創國時自守之道矣於古巴檀香山無不垂涎雖露
痕迹尙未顯有設施也海帶國之海口前此曾遣員向該國求之

此亦猶俄人之求朝鮮海口也乃朝鮮不允俄而海帶允美一則爲驚弓之鳥一則爲海客之鷗也

十六日

小雨時止亦時見日

美國希卡果兵艦前調赴墨洲爲水師提督坐船本月回美交船廠查驗有無損傷經查得此船巡海僅八箇月而船底生蟲已滿每駛行一日須減速率一百六十中里云 因按十年以前卽聞歐洲各國以兵艦下水後卽有一種海蟲附於船底逐漸而多而厚船行之速逐漸而減因思得一法以藥膏塗船底則蟲不附船以爲此患可永除矣今乃仍舊生蟲豈藥力之不驗歟抑美國新講求海軍尙不知歟

十七日晴

是日北黨總統已舉定卽現任總統哈利順也紐約紳士言哈利順於三月之前卽派有權力之紳通信各省布置一切一月之前美駐英之總領事駐法之公使特爲此事返美親至密臘巴里地方聯絡各省派來之委員而去年總統所派駐金山之按察馬羅駐中國之公使布萊爾均洽民心本年簽苛禁華人之例極爲迅速衆情翕然故得保舉聯任云 因謹按美國風氣如此保舉如此可見大權之操自民矣蓋各省派來之委員皆民所派也其中有民間訂定必舉某人者則委員無所左右也有民間訂定從衆所願者則委員可以通融也有聯絡委員之人則思過半矣

十八日晴

接北洋電發總署北洋電 日斯巴尼亞國以船廠造船工夫未精已聘英國船廠各色工匠管理云 因謹按地球之上兵艦商船以英爲最多且皆自造則地球船廠自應推英爲第一也因嘗至日國矣查其造船僅造船壳而機器仍購自英法今乃以整頓水師爲事而求自造亦自立之見也

十九日晴

本日伯林來電言俄都有信美國遊歷各國採訪風俗之士名比及羅名望素著近遊至俄境俄人逐之出境云 因謹按美人越數萬里以船載運糧食銀錢振濟俄飢可謂恭順矣遊歷人員爲

公法所不禁惟美國今年下議紳蓋力創立新例專禁華人而上
議紳仍駁棄之今俄人不必立例而輒逐美國遊歷之人豈天道
之好還耶抑所謂出乎爾者反乎爾耶

二十日晴

西正奉總署電云銷册寄還聞布連告退科士達接任外部確否
電覆號 十八日巴黎來電言歐洲各國日修戰備兵費日增近
日借款愈多籌借愈難多者八九扣少者至四五扣奧國賴德商
挹注尙未竭蹶然德亦難久恃若義日葡三國則府庫已空矣惟
法能取信於民借貸甚易且債票近日竟無虧損與德法交戰時
之落至折半者迥殊矣 因謹按歐洲各國武備如騎虎之勢其

有餘裕者惟其次則德法尙不竭蹶以其商務盛也其餘商務蕭條之國皆每下愈况焉然則有國者其留心商務哉

二十一日晴

覆電總署云布連退華頓署 昨日新報刊出美國殘兵卹款現已撥定來年所需計一萬二千四百八十二萬五千圓管理此事人員以爲不足應添一千三百萬圓查美自南北爭戰養贍受傷兵士前十四五年每年只二千五百萬圓以後按年加增所估來年入口稅項計一萬七千萬圓不過敷一年卹款云 因謹按美之卹款可謂巨矣此亦猶富貴之家踵事增華不免浮靡因嘗於

光緒十四年今

皇上親政奏陳四事其中崇儉一節言事逐情生費隨事廣益陸
宣公之論深得我心焉

二十二日晴

昨日巴黎來電言英國作事多拂法人之意阿洲英法教士既爭
權矣近勃爾加釐亞之君到英擇配英國竟以國王之禮待之豈
不知勃國係歸俄保護而俄法實同盟是尊勃而藐視俄法也茲
俄法兩君已諭駐英公使不與勃君同醮云 因觀此而知俄法
同盟之局已成也其始俄法二國猶諱言之今乃昌言之矣前俄
之外部至德曾言有權干預勃國之內政矣今又似不能干預也
者幸此舉出自英耳如係弱國俄廷有不聲罪致討也哉

二十三日晴

奧京來電言德國前相畢思麻爲其子婿於奧訂期日內赴奧而德駐奧公使例應相見德主乃令該使休假數日離任以避畢思麻前此傳言畢思麻復用似不確矣 因謹按德主襲前人之霸業令行禁止而輕創霸之畢思麻是飲水忘源矣畢相富國時威稜第一待以殊禮頗有俯視一切之概或以此而見忌於人然強鄰偪界而自壞長城非長策也 因於此爲德危焉

二十四日晴 入夜大風小雨而止

歐洲報言俄國飢民弱者爲餓殍強者爲盜商旅難行猶太人之去俄者尤多由俄入德國境界約四十萬人德人拒之不從至用

槍斃數人始不敢入境云 因謹按俄之民苦矣猶太居俄之民亦苦矣中國前此河南山東之荒尙不至如此也客民安居已久忽逐之出境至無所歸流離道路均仁者所不忍也

二十五日晴入夜大風小雨而止

本日新報言英廷造成頭等戰艦一艘自興工至成功只兩年半因查法國造頭等戰艦每需十年極速亦需五年較之英廠天淵矣 因謹按從前中國駐德公使李鳳苞於克虜伯廠訂造鐵艦至期不成一再展期以致中法之戰不能得川固該廠遲延之咎亦該使考究未深也知其廠中向來之工程遲速則臨時臨事有把握矣

二十六日晴

聞歐洲各國分裂阿洲至今不靖有達河米國王以兵攻法所踞之地商民不安法國因於英之野魯船廠定造淺水礮艦一艘以便深入內地小河長百英尺寬十八英尺入水十八英寸每一時辰行六十餘里容兵四百名船身分爲七節每節重二噸今已造成並已試驗矣 因查凡新闢之地未有不求恢復者然當今之世而欲如少康之一成一旅以興舊業求之未開風氣之國斷不能矣其強國已根深蒂固其弱國皆客氣虛憊閱時稍久同歸於盡而已可勝慨哉

二十七日晴

律司科司達持上議紳多福書言亞利干省宜設領事因婉辭之
因謹按設領事以通商也美國下議紳已普禁中國商人來美
矣事雖未成其迹可見我能使現在之不禁而欲以後之永遠不
禁斷無把握也且禁工已十年矣歷任至今未能駁除而且加厲
焉禁工而華人之來美者益少商務必衰方將裁減領事以節無
益之費增何爲哉

二十八日 晴中夜雷電

二十六日阿洲盛齊白城來電言德國駐防阿洲馬西之兵爲土
人所擊敗統領別羅受傷兵弁亦多傷斃礮彈被掠已退至麥林
地方矣 因謹按歐洲各國分製阿洲德法皆有損兵折將之事

惟英將施且來事前久於其地與土人相習其分有其地也不專恃威故土人未與爲難則綢繆之早而措置之善也

二十九日晴申刻見兩點仍露日出

美國紐約省博士渣士田歷年考究炸彈之法茲創一式以鋼壳內襯木筒貯炸藥以尋常大礮施放其彈重五十六磅半者貯炸藥五磅重二百五十四磅者貯炸藥三十磅驗時能穿厚三寸之鋼甲查巡海兵船鋼甲不過四寸此彈再求精利即可破之矣

因嘗謂數十年以後鐵甲船當無用以礮可加大而鐵甲不能加厚也今如德美所製之礮且不必加大能以五十頓之礮洞厚三尺之鐵甲矣今且以三十磅之礮彈洞厚三寸之鋼甲礮之力日

益而鐵艦之甲除康邦鐵甲及白鐵甲外未聞有更堅者則將來船之堅究不敵礮之利矣

六月初一日晴

倫敦來電言英國向不徵五穀入口之稅而英屬卡拿大澳大地亞地廣多種五穀運入英口與他國之五穀同不徵稅其利爲人所分今商務局議稟英廷請收他國穀稅而免本屬以示區別而專其利云 因謹按此美國之作俑也美國重稅他國而免本屬以冀他國鄰美之屬地隸入版圖故古巴頗有欲動之意茲卡拿大以本處之產入美稅重而美之五穀入英無稅上年美總統諭議院文已昌言其五穀出口之利茲英國亦以徵稅報之而其利

乃移於本屬之卡拿大矣洋人之於利已賤人心思無孔不入筭稍疏卽爲所賖殊可畏也

初二日晴

新報載美國製造之物爲多卡拿大則爲土產茲美國與卡拿大政府商免製造之物入口稅以爲報施不蒙見允是卡拿大得多而美國得利少茲總統已請上議院立例限制卡拿大貨物假道利益云 因謹按外國言利剖析毫釐中國人多鄙之而不知其不得不然也各國商賈輻輳於我非慕義向化也求利而已伺間抵隙以奪吾民之利有所限制則得其平聽客之所爲則工商失業自棄利權攘外安內經費何出歐墨各洲諸大國莫不如是

卽小國如比利時瑞典腦威各邦亦莫不如是也其不能如是如波斯芬蘭阿富汗者則日削矣

初三日晴天氣轉涼

新報言英政府前以英金四百萬磅購蘇彝士河股分票近此票價值日漲竟至一千九百萬磅不但利國兼且豐財云 因謹按蘇彝士地方向無所謂河也兵商輪船來往向繞道由地中海道遠費時法人勒伯西議集股分以開之開成後收來往之船費以彌補開河之費英人以此河爲咽喉之地如有兵事或有股分者創議封口則兵輪不准來往而英之水師失其強於是議購入此項股分票庶權亦我屬而不受制於他人此實爲軍務也乃該河

之來往船隻日多而入欸日盛則出意外矣然俄之西比利亞鐵路成則陸路尤便捷該河之來往船隻又當減於此時矣

初四日晴酉刻大雷電風雨至夜而止

昨日伯林來電言義王赴德與德王晤商者係因德奧義三國聯盟約定各備重兵而義經費不足無可設法支持因以減兵之意商諸德王德王以減兵則爲示弱將致敵國之輕必不得已代爲籌貸於德商庶兵食均足云 因嘗以歐洲增兵增艦爲騎虎難下之勢爲鵠蚌俱斃之道今果然矣義固不能支德奧亦不能久支俄亦不能久支也法固後於俄德然亦不能常其能久而不做者其耳然則俄法聯盟德奧義聯盟相持不解兵費不支及其做

也義奧爲先德法繼之俄人尙可自守而英坐收漁人之利二十
年內可決之矣

初五日 晴涼

巴黎來電言法國書辦紐闌尼以海防圖私售德義二國其售德
國者爲秋巴海佛伯來士之圖售義國者爲米地得闌尼之礮臺
道俞地方新制之礮臺均有實據道俞礮臺工尙未成擬改換新
式云 因嘗言歐洲各國機心機事無日無之此其一也中法越
南之役北甯守兵當法來攻時礮不鳴兵不戰各鳥獸散粵省守
隘之礮多爲強水所淋此皆內有間謀也然則不逆不億非難先
覺者爲難耳

初六日 晴涼

昨日巴黎來電又言法國亦以重資募英人名火而膽密探德義兩國之礮臺在地中海之兩處及在德法交界者故不能以偵探本國之礮臺責他國云 因查交涉之道莫非自私自利之見雖有智士亦不能盡伐其謀賴在有以防之并有以抵制之耳如偵探之方槍礮之利兵艦之堅賴在有以防之要求之非理侵佔之不休詰責之不情要在有以抵制之大抵太剛固折太柔亦廢蘇老泉曰慎勿爲積威之所劫誠哉是言也

初七日 晴陰午後大風雷雨刻雨止

初五日馬得力來電言日斯巴尼亞國稅則於貨物入口有輕重

之分茲英國政府與日議定英貨入口均照輕稅則并無報施日
國格外利益云 因閱此而喟然歎曰甚矣立國之不可不強也
今日之勢一弱肉強食之勢而已矣強者事事得利弱者步步受
虧是強愈富而弱愈貧強者愈強而弱者愈弱矣夫日弱於英俄
德法義諸國而視歐洲之他國猶強故稅則分輕重以輕稅處強
國而以重稅處弱國弱者固不能與爭也且爭亦不允也所謂失
之東隅收之桑榆也

初八日 陰時見日午後小雨止仍陰

昨日巴黎來電言自一千八百九十三年三月三十一號起議院
所定煤油入口之稅熟煤油每一百基羅

每基羅合兩英磅又
五分磅之一合中國二

十六兩零一百五羅合 收稅十八佛郎 每五佛郎合銀錢一圓

八錢零十八佛郎合銀錢三兩 生煤油則減收三佛郎 現在以期將

四六角合中國銀約近三兩 滿擬至明年三月改議稅則時照新例辦理云

初九日晴

赴外部道喜 上年九月美國醫士家理下至英遊歷英人以其

在阿爾蘭與地方匪人謀戕英官拏審定以監禁終身之罪茲聞

費成善會稟呈總統言其無辜請與英廷理論云 因謹按此可

以證中英美生交通會匪之案也此可以證英員之不公也此可

以證中國辦理之失平也同一謀逆而美人於英謀逆則由英斷

英人於中謀逆則不由中斷美人於英謀逆則監禁終身英人於

中謀逆則監禁九月豈得謂之平乎中外交涉凡不平者多矣皆類此也此可爲長太息者也

初十日晴中夜雨大風排闥徹曉

是日爲美國七月四號前一百十六年此日爲美國改爲自主之國之辰相沿至今以爲吉日合衆國上下升旗鳴礮不理公事

因查美本爲英之屬邦英征稅重美人怨之華盛頓倡爲自主之議英人伐之美與力戰八年英不得志法與和出而排解許美自主而美遂爲五洲之大邦焉嘗者華盛頓之拒英非必戰勝攻取但以堅忍之力肆應不疲損傷相當守者無瑕攻者敵矣儻爾時氣懾於強敵功廢於半途俛首請和不過如印度阿爾閣之屢蹶

不振受命而已安能若是之富強哉若華盛頓者亦可謂人傑也
哉

十一日晴

美英祕林海峽爭捕海龍一案初九日域多利來電言阿拉斯夏
有英漁船二十五艘網捕海龍現爲美兵船考溫所獲并海龍六
千條充公又獲供火食之船考闊拉云 因查美英爲祕林海爭
捕海龍一案齟齬累年若在他國必畏英之決裂矣近已請局外
之國調處判斷法義兩國均允法爲紐芳蘭之案與英不合義爲
紐阿連之案與美不合而不辭調處者通好之國例當彼此相維
也英美亦不畏法義之挾嫌者局外之道不願偏袒招怨也

十二日晴

上午巴黎來電言近日越南東京駐防之兵屢爲土人舟師所挫
法國防兵一百五十人被斃者十七人逃亡者十六人云 因於
此而歎越南土人之有志也法國始假保護之名而卒侵其地驅
其民蹂躪其鄉里苛斂其賦稅土人之憔悴於虐政者至今日而
始知我

國之寬仁矣時時擾之所以報之惜無華盛頓其人者撥亂反正
而自主也

十三日晴

倫敦來電言阿洲之摩洛哥國小而無政匪徒往往滋擾商民茲

英義日三國近訂密約謀滅之而分其地云 因查阿洲之地英法德義日葡諸國已瓜分之摩洛哥卽修內政臥榻之側亦不容許睡也謂其滋擾商民者所以加以可滅之罪三國共立密約者所以防德法葡之妒居今之世一弱肉強食而已

十四日晴

本日報言卡拿大以雞蛋入美美關按十二枚抽稅銀五分擬卽抽美國雞蛋入口稅以報之又近日美與日斯巴尼亞立報施約因獨得古巴利益卡拿大應與美國同沾如日國不允卽徵收古巴糖煙入口稅云 因於外國之稅則變更及彼此稅則之施報必留心者非好爲瑣屑也中國欲水陸兩軍之強必求經費之足

而不能足者則以入口之稅未講求也稅則爲內政例可隨時整頓亦可隨時加增墨洲之三德明哥極小之國耳而其稅則按物值征百之四十未聞開釐則以其爲內政而應由本國主權也雞蛋入口銷數至微者也推稅而計及此中國必恥言之而英美至富之邦乃斤斤然爭之而不少讓焉外國交涉之事大抵如斯熟於此道者自知之

十五日晴

美政府以本國稅關章程不如歐洲之善特派商戶部司寶訂總辦稅務考司多克赴歐洲各稅關查考一切以便仿照辦理準於今日啟行云 因謹按法無歷久而不做者亦有新舊而未備者

美自華盛頓開國至今僅一百十六年所訂稅章自不若歐洲各國之備此其所宜參互考訂者也我

國中外通商收海船稅僅數十年嘗考其章諸多疏漏安得一爲整頓乎

十六日晴

美紳某來見言印度來信謂現在亞細亞洲俄兵四出侵阿富汗之界臨英屬之印度中國之新疆云 因嘗考俄國近三百年之疆域而慨然也當明之季年僅七十五萬六千方里耳至國初而驟增至四倍矣再一百年而又增三倍再一百年而尙無所增至道光年間則驟增增至今日而至十一倍蓋七百九十萬餘方里

得全地球六之一焉其侵諸歐洲者則瑞典波蘭土耳其波斯等國約四百萬方里亞洲則回部最多基發霍罕茂甫穆哈刺黑龍江以北則近年所侵佔者也近又注意於印度英人未必肯讓然阿富汗之疆宇必日蹙矣

十七日 晴夜雨

日本新到參贊來謁卽往答拜 因昨考俄國疆域驟增之數因并憶其民數而筆記之俄國當我雍正初年民數只十四兆越二十二年而增二兆又越二十年而增三兆又越二十年而增九兆又越四十年而增十三兆又越四十年而增二十七兆是爲咸豐元年及至同治五年又增十七兆共計八十五兆餘矣其所以增

者非關休養生息蓋因地剛而民亦益所謂有土有人近比鄰小國蠶食殆盡非復往年之易於開拓矣

十八日小雨

昨日柏林來電言德奧義三國聯盟因英外部大臣與義密約如法攻義則英助義故義樂於聯盟現新舉議紳與外部同黨者少而英各部臣非議紳相得不能久於其任若此則外部難留義之聯盟亦難固云 因閱此而知俄法兩國實招各國之忌也二十年前德國攻法則英坐視英與法固比鄰也俄國攻土則英救援英與俄又兒女親也然則憑陵之習兼并之風身受者固不願也旁觀者亦不平矣

十九日晴

十五日巴黎來電言接越南來文謂駐防東京兵弁於白刻爾地方被土人埋伏狙擊領兵官旁尼兵頭卡丙打均陣亡兵士斃者十人傷者稱是云 因查越南不服法國之情曆見粵出自李埃利以來損兵折將者頻矣因論中國屬地琉球并於日本緬甸并於英越南并於法惟琉球不聞相抗大約世守荒島無遠志無武備依人爲生而不暇擇主者緬甸勝琉球越南又勝緬甸其民似可用者

二十日晴夜雨

昨日美國戶部刊出自上年西曆七月一號至本年六月三十號

此十二箇月內計美國出口煤油共值銀四千四百十九萬一千零七圓較前一年少七百餘萬圓云 因查美國煤油至中國者約十之八至歐洲者十之二緣歐洲各國其繁盛之地皆電氣燈次則煤氣燈凡客寓輪車火車無用煤油者所以防火災也且其收稅極重已見於法國報矣至美國出口之數此一年中遜於前一年者則以義國已禁不入口銷路之偶窒非出產之不豐也且俄產煤油近又日多此二國之油幾徧給地球各國矣

二十一日 晴未刻雨仍晴

昨日伯林來電言德前相畢思麻議論國事每揚德主短處德主怨恨有送畢相交官懲治之言終以其功在前王惠溥萬姓不敢

輕舉而止茲畢相擬周遊德國各處其時人民夾道歡迎又恐觸德主之怒云 因觀此而歎畢相之不可及也議論國事此老成之不忘國也揭德主之短此老成之不忘君也向以畢相爲伊尹太公一流人德主如能信而崇之則爲太甲成王亦守成之令主而足以保威稜第一之勳名君臣之遇足千秋矣

二十二日晴申刻大雨仍霽

謁外部商檀香山華人求美國公使領事保護事外部允卽行文又聞美國兵艦水手在智國被殺斃三十五人一案現索賠卹銀二百餘萬圓智國以爲太多飭駐美公使與美外部商請減少外部謂總統之意如此不允減數云 因按智國內亂方定而外患

與矣日國已索賠三百萬美又索賠二百萬他國雖未聞大約亦必有也智適內亂庫幣已空必出重息以貸勢將日貧貧則弱矣
二十三日晴

二十一日報言賓省之必司堡大鐵廠及挨達活省之礦均用人數千名現工黨停工請工地方官不敢彈壓急電該省總督發兵八千山火車馳往圍之現該廠主議不用此項工人另行招工云 因查歐墨兩洲之公司極大用工人極多工黨之勢亦極橫英德兩國工人滋事尙未了結美國又復滋事幸電報火車之迅速兵力之厚調動之捷否則緩不及事非蹂躪百姓亦必分裂公
司矣

二十四日晴受寒不爽

美兵官來見言及沿海各省以美廷現在整頓水師遂招集壯丁習練水戰一旦有事不患無人美政府遂派水師提督一員巡歷教練云

二十五日晴是夜泄瀉

二十三日報言美國新造兵艦數年可竣竣後有兵艦四十五艘所載噸位三百六十四尊員弁兵丁一萬一千零四十九人內計頭等厚鐵甲五艘重甲巡海船三艘雙旋轉礮臺船六艘巡海十艘六艘礮艇六艘水雷炸藥礮船五艘水雷船三艘鐵殼船一艘云因謹按美自經紐阿連祕林海峽兩案以後整頓水師听夕不

遑亦可謂自知所短者矣蓋美之國勢本不爲強徒以亞墨一洲盡爲小國無足相抗者美於是若夜郎焉然外侮不在同洲而在隔海輪船興後履若坦途及此武備不修匪特決裂以後抵禦爲難卽交涉之間持平亦不易矣前日已聞其練民兵今又報增戰艦備豫不虞古之善政也

二十六日晴酉刻大雨

卯初盥漱因率使館各員黎明行三跪九叩禮辰刻設齋中正設醮 美國之揆達活省五金礦上年所採金銀銅鉛值銀一千萬圓黃金居十分之三現年冬春多雨雪淘洗礦沙較使開出之金較上年多二成云 因查北墨洲多五金礦墨四哥與美接壤美

富而墨窮豈開礦不得法歟抑其人不足恃也美國傳言中國京北之礦有英人承辦開採已見之於報矣

二十七日晴

至外部晤總辦播郎詢美國新例禁歐洲工人來美歐洲各國公使有照會論及此事否答言無之因謂當不能全無播郎謂如果
有之則報紙當刊出矣因請查公牘播郎答以容細查之改日回
信 因前晤德國駐美公使詢以美國新例普禁歐洲工人入境
貴國何以處之該公使答曰我國本不願民人出境以壯年者均
須隸兵籍也本國又不能盡禁美國代禁恰合本國之意聽之而
已然則歐洲各國豈盡如是耶

二十八日晴

接紐約書言近日賓省銅鐵各廠工人停工滋事其意使各廠公
司無人僱用將來自可予取予求嗣聞外國造銅鐵各工由歐洲
來美者日多一日工黨因卽稟請戶部大臣請於工黨之內挑選
兩人派充紐約埠之巡驗來美客民差役以杜違例來美之弊戶
部已允派云 因觀此而知工黨之權重也然美國亦患人滿矣
嘗閱美國人數表一千八百七十三年其民數只三十八兆迄今
僅十九年已增至六十餘兆此非生息之速乃客民入籍之多也
再過二十年將有人滿之慮與德義諸國相同不得不深思而早
計而工黨獨擅其利之意亦於是行矣

二十九日晴是夜大雷雨

上議紳地甫司來贈小女物一件談次言美國以白耳底馬兵艦水手被戕索賠於智前月智國新任外部愛拉協力接任照會美國允接舊例每名卹二千五百圓計美銀共七萬五千圓美總統已允收了結矣 因查美兵艦水手之家屬索賠甚鉅而智國所賠只如此數者歐亞兩洲有例可援也因嘗詳詢之美國官紳練習時事者均以爲不過如斯而已然則中國所戕西人其賠卹動輒逾萬而中國之人爲西人所戕者或竟不賠或所賠甚少則不諸西律之故也

三十日晴

昨日報言美國由卡那大河道運貨來往英關抽稅較英屬貨船爲重美政府屢向英廷駁論未除總統乃請議院立例於卡那大商船出入美境亦照英例重稅以報之下議院已議准今交上議院矣 因嘗論外洋各國通商爭利抵隙擾擾不休有以爲洋人嗜利無饜者不知不如此則拱手讓人以利權而民財之卮漏日多久則貧瘡也但其間細鍼密縷非寢饋其中者不知非揣摩有素者不能非公法精熟者亦不敢耳

閏六月初一日 大吉晴熱

答拜譚紳地甫士座中有自俄回者言俄國大饑道殣相望而整軍經武仍不稍緩德奧邊界時復增兵經營瑣春不遺餘力大約

歐亞兩洲之鄰國將來必有被兵者 因謹按古人修德弭災之
言至今不行而不戢自焚亦不能全信矣俄之災重矣而佳兵依
然俄佳兵久矣而不聞敗衄豈真人定可以勝天乎毋亦有天命
者任自爲耶

初二日晴大熱寒暑針至九十四度

智利來電言兵船水手案結後美國向智國索賠之案自一千八
百二十八年以來未結者甚多茲美外部飭駐智公使催智政府
商辦以清積牘云 因查美與智索賠之案有延至六十餘年而
未結者非怠也以前則風氣未開墨洲交涉尙重義而輕財近二
十年間智頗振作祕魯一役幾霸南洲美國久無外患水師未事

整頓近年則美之水師漸強而習之兵力美亦盡悉習於美艦水手之案又自顯露虎頭蛇尾其技術可知故乘其畏我之時一振國威使智利俯就範圍其餘小國不煩鞭策矣

初三日晴大熱寒暑針升至九十八度

德國近關阿洲東北地方多歸德保護矣有莫三鼻給島在阿洲東南向屬葡國近以葡國府庫空虛所欠德國之債難償德國請於葡廷願以此地抵還債項云 因嘗閱歐洲各國報葡國有鸞地之說未敢信也然考其近年出入表每年入欸不過銀一千六七百萬兩出欸需二千一百餘萬兩入不敷出固已巨矣國債之息每年需銀一千一百餘萬兩則債息已將耗入欸之全而國用

所需幾無所出焉宜其窮也宜各國之疑其嚮地也

初四日晴戊刻大風雷雨約一時而止

美紳某來見談久言俄國西比里亞鐵路工人近加至一萬二千名限於秋冬告成又伯林來電言勃爾加釐亞國有刺客謀刺其君及各部臣當時雖疑爲俄所使而無實據茲勃政府查得俄廷致駐勃公使密電令該使與刺客聯絡當將電文分達德奧兩國政府德奧已請勃廷詰問俄國矣 因謹按古人所謂睦鄰字小之義今不復見惟見蠶食鯨吞而已俄造西比里亞鐵路藉口通商其實志在朝鮮於勃爾加釐亞國內政藉口干預其實志在廢置居心積慮無非夷縣小邦耳乃甘出於暴客之所爲獨不懼傷

國體哉

初五日晴

近聞英義日三國密約共滅摩洛哥三分其地英廷遂派公使往
摩明爲立約實欲保護法人妒而陰阻之英謀不成將來英擬派
兵赴摩法亦派兵前往前德相畢思麻嘗論歐洲大國起釁必由
於爭摩洛哥茲已見朕兆云 因嘗讀商書至兼弱攻昧取亂侮
亡而歎千古興廢之故不外是也孟子創言字小之論欲以救當
時并吞之習而究無補於時不若商書所言爲合栽培傾覆之理
也摩洛哥政事不修日就衰弱與阿洲之突尼斯歐洲之波蘭相
同自蹈亂亡雖欲圖存而不可得矣

初六日 晴熱

美駐日本公使函致外部言俄國煤油公司新創油船載大桶煤油由歐洲取道蘇彝士河運至印度中國日本南洋各島發售此舉若成必奪美國煤油之地以其運費較美爲省也應飭美煤油公司早爲設法以免此利爲俄所奪云 因查公使之任匪特以聯邦交凡有關於本國之利源者皆當留意也俄國煤油出產日盛已習聞之所以不能爭勝於美者俄由陸路運出不及美之水路運出之費輕也今設法由船專運則費輕矣與利非託空言也必有與之之法惟留心者乃知之耳

初七日 晴酉刻大雨雨止仍晴

前二日伯林來電言英法德三國定界三分阿洲之地後德國遂派員帶兵入境察看情形而英國商民聞德員將至卽給土人槍彈截德員於機爾曼赫大山之間盡殺之。因按上年德人攻阿洲時英兵官施旦來會教土人拒德德不得志讓地於英今德又被英商指揮兵弁盡殲於阿蓋英人之遊歷阿洲深入內地已十餘年久與土人相洽浹發縱指示德人斷不能如英之靈也弱肉強食之中強者又自相齧如三虎爭一牛惜無卞莊子者因以爲利爲可惜也

初八日晴陰午後雨雨止見日酉刻又雨

查得美國費城刻拉生船廠製成新式兵艦於初四日試水副總

統水師部大臣親到命名可倫比亞該船係三旋螺

凡一旋螺每時行三十海里

里再旋者行三十六海里三旋者行四十四海里

馬力二萬匹戰時可加力三千匹容煤

二千噸足敷行二萬餘里之用長四百英尺寬五十八英尺容七千四百噸置八寸口徑礮一尊六寸者四尊四寸速放者八尊小而速放者二十尊水雷六船價二百七十二萬五千圓并軍器雜項共三百二十萬圓 因謹按弓矢之制變而爲槍礮利木之制變而爲鐵甲鐵甲之堅兵刃矢石不能入惟巨礮與水雷可以破之礮之百噸者每尊需銀十萬兩水雷之新式者每箇需銀三千兩居今日而爲攻守之計非鉅款不能此小國所以日盡貧國所以日削也然則欲言強者非富不可也

初九日陰

本日金山來電言接倫敦電知新金山域多利埠新定進口貨稅
松板千片加稅銀六圓二角五分裝罐水果每磅加稅銀六分美
商以該國如此重稅必因美國新定重稅阻新金山入美之羊毛
以此報復如英之屬國皆然金山出產不銷種水果者無市矣
因查美國自增入口稅以來大國如俄英法德義均各有報復矣
小國如墨西哥尼格拉孤亦加稅以報之卡拿大屢議加稅而尙
未休此外則未聞焉大抵皆入美之貨甚微而或不能振作者也
歐墨各國交涉事無巨細無不有抵制之法否則事事受虧而惟
利己是圖者必毫無忌憚也深心者自知之

初十日晴陰

新報屢言英兵船加那欲佔太平洋中喬士頓島美政府已查舊案此島係美國船主勞亨之產歷年經理已費五萬圓向有船駐守以經費不敷而止該島係由美至中國日本之要衝亦由檀香山至錫蘭之要道但須費銀一萬圓轟去口內暗礁便成絕好島隔美斷不肯讓英云 因查海中荒島向之以爲棄物者今皆重之非地勢之有變實時勢之不同也自鐵艦興後行船不恃風而恃煤煤盡則船不行當無事時隨處可以市煤固不憂匱乏也兵燹一開則隨處皆當守局外之義不得市煤故當圖之於早圖之於早莫如隨處有屬島存煤候用則有備不匱焉此爭島之事所

以層見疊出也

十一日晴

見上議紳拔茅訪問印度來電阿富汗部落爲亂英印度總督已派兵至界防守昨日倫敦來電俄又派兵三隊踞巴美爾地方卽去年所踞之地今復踞之云 因謹按巴美爾爲歐脫之地而與中國及印度阿富汗毗連俄人得之則四出蠶食隨其所欲聞俄之台士根省饑民作亂已戕該省總督且敗兵官俄方平內難之不暇而乃亟亟於開邊蓋弱肉強食其性然也

十二日 晴夜雷雨

美外部長訂見午刻赴衙門德國代辦已先到見後 因至道寒暄

畢因言貴國增立苛例於中國文絕不覆而戶部已謬刊行何也
外部答云尙未刊行照覆俟徐商之因言金山副領事之缺金山
省上議紳飛路頓言此缺應派美國人員庶於中美有益因言此
非議紳所能干預且飛路頓卽與蓋力同創苛例者彼安顧中美
之有益耶外部再言之因言此事已請示總理衙門使者無權容
以尊意告之遂言檀香山保護華人事外部言已函致美國駐檀
公使尙未見覆信也因遂辭出

十三日晴

寓檀香山中國華商稟請照會檀國政府以古今輝王殿璋加正
副領事銜保護華人因以中國未與檀國立約不便照會遂請檀

國駐美公使於亞林頓客棧託其致意政府檀使謂古今輝王殿
璋二人向常見面故知其入立身公正可令保護華人卽當致意
本國政府又言中國宜速立約則事自順手因答以立約一事因
已商之政府適值美國立例苛禁華人故政府不願當從緩議檀
使領之因遂告辭

十四日晴

檀香山公使來會談次言美國增其國糖入口之稅有背舊章頗
爲不平又言美國擬於尼格拉孤國開通東西洋以專其利如蘇
彝士河已與尼國立約將興工矣而法人以巴拿馬工程已費銀
三千萬圓不甘中止而讓美國現於巴黎集議擬籌鉅款并招工

頭包辦尅日興工云 因按此法人之好勝也巴拿馬工程停歇已久創辦之勒伯西屢次集股渺無應者今聞美國開尼格拉孤之道而法人復集股興工雖曰好勝亦不棄前功之意也嗚呼當今之世亦特患其不好勝耳

十五日晴

近日美國製造玻璃器之工人聯名稟於戶部言歐洲各國此項工人來美者多漸奪其利請於該工人中派人於紐約波士頓費城波地磨等埠之廠查察以杜其來戶部長已批准云 因查美總統諭議院之文曾言准巧匠來美製玻璃器者非巧匠乎工黨欲專其利遂使總統自食其言民主之國固順民情獨不愛國體

哉

十六日 晴天氣轉熱

十四日維也納來電言奧國大軍於十六日在嘉里施阿省大操陣法除德國駐奧公使准觀外其餘俱禁往觀且派馬兵四面巡邏以期機密云 因查前此法國大操准各國派員往觀雖讎敵如德國亦與於會今奧雖示機密毋乃軍容尙有不足者不堪以弱示人乎

十七日 晴熱

十五日柏林來電言德國與南墨洲之可倫比亞國立約通商德商甚喜以該國市利向爲美國壟斷今德立約使德土產多一銷

路而可與美分其地也 因於各國立約之事徧諮親歷而有以
窺其心焉大國與大國爭利鎔銖不讓惟心計之巧交涉之熟者
操勝算焉其與小弱之國爭利直以勢迫之甚則頤指氣使而已
故大國與大國立約互爭兩國之利也大國與小國立約將分彼
國之利也而小國與各國立約亦有利焉如歐洲之阿富汗則英
俄互相牽制而不至於亡墨洲之檀香山則英美互相牽制而不
至於亡土耳其則英法各國保之而不滅於俄比利時則歐洲各
國認爲局外而不滅於德法若亞洲之浩罕機窪越南琉球均以
無約無牽制而驟亡者也

十八日 晴夜大風雷未雨

至美國家銀行談次聞俄國西比里亞鐵路俄人督工日夜不休
限於今秋告成而鐵路之料由黑海轉運者全船壞沈以致停工
待料須延數月想必待今冬明春矣 因查俄造西比里亞鐵路
固昌言爲商務計也俄於中國北路入口商貨不過值銀數百萬
兩而以值萬萬兩之鐵路求利乎或曰俄以此開源爲以後計也
俄之府庫空虛方苦無門借貸而乃不顧目前之急以冀後此不
可必得之利乎俄有人焉應不若是之失算也然則忖度其心中
國西北毗連之地其宜設防乎

十九日晴戌刻有風雷小雨

聞墨西哥因國用不足向其商借銀六十萬磅兩年交還美國駐

墨公使查墨國進口貨船以美爲大宗內江之船美居十之六七
墨國運載之利幾爲美國所盡奪云 因閱此而知美之所由富
墨之所由窮也 因鑒此而願爲中國進一解也中國外洋運載之
利全爲英法各國所專日本運載之利則爲日本所專內地江海
運載之利則爲英美所分雖輪船商局創設十年然收回者不過
三之一耳幸中國根柢盤深不致精華盡賤然已非復昔日之富
饒矣其亟思挽之哉

二十日晴

至博物院又至種魚處查博物院如禹之鑄鼎象物所以廣人之
識見耳目也其院外古樹二段長二丈餘圍八九尺色黑由掘地

而得業已全化爲石且作石理質堅如鐵院中礦質五金皆備金有涵於土石中者有結成方粒者寶石則綠者甚多其色不一珍珠如大豆者其光晶瑩魚骨獸骨有長至數丈者猿類至多小者僅如鼠大者過於人狀貌獍獍手足皆如人而足又能握或曰狻也古棺一具盛骸一具亦山地中掘得均化爲石鋸魚一種屨之上生成一骨兩邊爲鋸紋烏賊魚之大者其足長丈餘蝦頭如大甕其鬚亦長丈餘蟲類則大而蝮蛇小而蠟螻無不有焉

二十一日 晴天氣轉涼

希卡果華商由卡那大回美稅關收其照而不納稟請駁詰遂仰謁外部時德國代辦先到談次因言德主至英通好事德代辦言

德主之勤儉實爲難得夙興夜寐事必躬親新定營規黎明即起
浮費盡裁按日三餐不准飲酒操演之時自統帶至哨長均不准
乘車馬以習勞內有武員名格立事者向來畏勞業已辭職云繼
見外部告以稅關阻華商事并交以律師原信外部允卽通知戶
部電查

二十二日晴

十八日巴黎來電言法國以阿非利加洲之馬達加斯曼國之北
所屬格羅力殺島爲印度洋要道業已踞而有之云 因謹按光
緒十年中法交戰之時法國卽加兵於馬達加斯曼國該國力不
能敵遂偪之立約歸法保護甫八年耳乃遽佔其所屬之島弱肉

強食習爲常矣近年佔島之事層見疊出大抵英法居多德偶有之美則多以計求或以銀購蓋水師之力有不同故措施亦不一而無非爲水師之強計耳

二十三日晴

倫敦來報英廷以俄踞巴美爾意在印度已由印度派大隊兵馬赴阿富汗以防俄人及阿之亂黨又中國天津來報亦已派兵防於邊境云 因查俄之不得逞志於歐洲也以德義奧三國聯盟無隙可入也顧其養兵太多需費至鉅勤而無所必有悖心故斷不能無事而思用之亞洲巴美爾一隅可窺阿富汗可窺印度可窺西藏譬如狼奔豕突有閒則來則備之不可以已也

二十四日晴

金山商董陳大照來爲華人領照及賽會事請與外部商之訂以明日因查賽會一事卽周書所云奇技淫巧也然商王以玩物而泰西以利用其用意不同焉槍礮之門藥易火繩而爲火石易火石而爲銅冒易銅冒而爲錠皆漸臻便捷也礮之式易而爲後膛礮之架易而爲車盤皆欲其靈便也自德國以一百噸爲一塊之鐵賽會而礮日巨自英國以一萬噸之船出洋而船日巨此僅卽用以戰陣者言也若夫農桑之利便民之方算學化學氣學重學光學無不各出心思以求精進富強之業基焉甚未可以奇巧而斥之也

二十五日晴

謁外部長言戶部所定華人領照例窒礙難行外部答曰此例由
議院議准總統允行外部無權廢棄因曰中美二國有約之事豈
美國所能專行領照新例中國固不允行美國擅行則爲背約中
國據理當駁外部曰此事當於暗中通融舍此之外外部實無權
辦理因曰金山商人已請董事前來可否賜見外部允以次日因
又言賽會事總辦尙未準定給華商設會地段何也外部答曰當
代告總辦仍屬商董自往商之因遂告辭

二十六日晴

午刻帶金山商董陳大照見外部長寒暄畢外部詢陳大照意欲

何爲陳言領照實多窒礙戶部擬章亦難遵行外部曰領照新例由議院議行總統允准戶部擬章不過遵照辦理此章與例有不符處則可駁詰陳未能對因答曰以美戶部行美議院之例安有不符所不符者中美之約耳外部曰余亦深爲惋惜且陳君之意何如陳請於開議院時再議外部曰姑待之陳又言賽會事外部謂此由戶部主之人數勿多致招疑忌遂辭出

二十七日晴

遊華盛頓第宅乘小輪船約半時辰到岸上小嶺高數十丈至華盛頓墓有屋一所自鐵欄外瞻之白石棺二停土面蓋夫婦二人也屋外左右有神道碑又前行不半里至其第局面甚小鄉居蓋

如是也第一層畫華盛頓像縱橫約八尺爲騎馬赴敵影前一將
執刀馬前後則華盛頓之兄最後則從戰諸將皆騎馬像外有華
盛頓親筆書又德法諸將小照皆從征有功者右室爲洋琴竹笛
琵琶各一則平日所陶情者室外衣架二海花一朶爲婚時人所
贈者遂上第一層樓中廳掛槍一枝牛角笛一具下置筆架墨盂
廳前掛刀二柄長二尺餘皆其生前所用之物樓左右男女像各
一則其兄妹前爲客房後爲華盛頓臥房房中有瓷盆木箱木榻
華盛頓卽壽終於此榻又上第二層樓則臨江一室可眺長江又
一室亦置盥具并木榻則其夫人之臥房也夫人後君歿卽壽終
於此榻再上一層則已屬不可陟乃下至各處瞻眺畢約未初遂

返 因謹按美國舊爲英屬地英以爲外府抽稅日重民不堪命
乃拒英舉華盛頓爲主慶戰凡八年英不能勝美遂自主蓋西歷
一千七百七十六年爲中國乾隆年間越十年而舉華盛頓爲總
統又十年辭位又二年薨壽六十七歲因至其墓其宅竊罕然仰
慕其爲人也功在美國而不自居名滿天下而其宅不盈五畝自
古英雄未有不宅心淡漠而能成功名者外洋何獨不然乎

二十八日 晴天氣又熱

伯林來電言德國兵制凡男丁二十歲至二十七歲均在營習軍
務三年不准倩替如遇戰事則備調用至四十五歲而止德兵臨
陣向不失措者以習練有素也現德民以學習兩年儘可通曉兵

事且德兵已精而壯丁以此虛耗歲月可惜請改作兩年廷臣均謂可行德主小心尙未允云 因謹按德之地輿當中國十五之一其民數當中國十之一而介居俄法兩大之間俄法皆事兼并而德足以支持者強之故也其民四十一兆數非多也而通國皆兵則兵多矣且人人習於戰陣則精兵多矣其地二十一萬方里土非廣也而入款至銀三萬萬兩有餘則國富矣以德之國勢而富強如此者其所規畫者可謂煩難而卒以成功稱霸有國者足以興矣

二十九日晴

英京日報言俄人佔踞巴美爾實有侵陵阿富汗印度之意蓋其

欲有事於亞洲久矣英相格蘭斯登與德相畢思麻齊名決不讓
之孟買報又言俄兵踞巴美爾後現分五路進規印度哥希正查
探路徑云 因前聞俄人有言英俄相持不下久矣當乘時以決
雌雄又言俄人於巴美爾事英人如或干預俄必佔取英之印度
地方云云今英人於俄踞巴美爾不過撥兵以固印度之藩非干
預也俄果窺印度乎